



Ellas ed el han obtegni ils emprims trais posts en la categoria U13–U15: Oriana Jäger, Enrica Caluori e Lian Maissen (da san.).

FOTOS G. N. STGIER

Procurà per il «culp» han las mattas

Tir: Di da juvenils a Domat

DA GION NUTEGN STGIER / ANR

■ **Cun Enrica Caluori, Lorena Cadalbert e Christina Ambühl han trais mattas gudagnà la concorrenza cun 60 participantas e participants. Insumma han persvas ils mats e las mattas da la Surselva e dal Grischun central sonda passada a Domat.** Il di da juvenils 2016 è stà in success cun sajettar ils mats e las mattas buns resultats e cun esser stadass las relaziuns optimalas. Tratg è vegnì cun l'arma a caliber pitschen e quai sin la distanza da 50 meters. *Walter Umbricht*, il schef da la partiziun juvenis tar la Federaziun grischuna dal sport da tir, è stà cuntent cun la participaziun, cun ils resultats e lura er cun la disciplina. El ha fatg ina bilantscha positiva ed è sa mussà cuntent dal di da juvenils che ha gi lieu en il stan da sajettar La Val a Domat.

Grazia als megliers dieschs

La victura tar la categoria U13–U15 sa numna *Enrica Caluori* ed ella deriva da Panaduz. La matta da 14 onns ha tratg 189 puncts e gudagnà la concorrenza grazia als megliers dieschs che *Oriana Jäger* da Cunter che ha er fatg tants puncts. Ella è dentant trais onns pli giuvna che la victura, ha persunter profità dad esser ina buna biatleta ed uschia avair ina tscherta experientscha cun l'arma a caliber pitschen. Cumplettà il podest ha lura *Lian Maissen* da Trun cun far 188 puncts e be in punct damain che las duas

mattas. Sajettads èn vegnids duas gia diesch culps sin la schiba da 10. La mesadad dals 25 participants ha tratg dapli che la limita minimala da 178 puncts, ils puncts necessaris per retschaiver ina distincziun. Da la partida en la categoria U17–U21 èn stads 23 mattas e mats e tratg il pli precis ha *Lorena Cadalbert* da Sevgein. Ella ha sajettà 381 puncts e quai èn tschintg dapli che *Tino Coccia* da Rueun ch'è vegnì segund. Il terz plaz, quel è i a *Linus Frigg* da Tusaun e quai cun in total da 374 puncts. En quella categoria cun in total da 40 culps è la limita per far la medaglia stada tar 363 puncts.

Clera victoria per la matta da Tavau

En il matsch da trais posiziuns (en venter, en schanuglias ed en pe) è *Christina Ambühl* da Tavau stada ina classa per sasezza. La chatschadura e scrinaria da 19 onns ha sajettà 535 puncts ed uschia tratg in pau pli precis che la concorrenza. *Claudio Schwendener* ha cun ses 527 puncts procurà per ina victoria dubla per il team da Tavau. Il terz plaz ha obtegni cun 519 puncts *Leandro Petschen* da Trun. La concorrenza da gruppas dalla categoria U13–U14 han dominà ils trios da tiradurs e tiraduras da Cunter, Landquart e Tavau. En la categoria dals pli «vegl» è la victoria ida a la gruppa da Tavau avant il team da Landquart ed il trio dalla Surselva.

La rangaziun cumpletta chattais vus sin la pagina: www.kbsv.ch



Plazs da podest er per Linus Frigg (a san.) e Tino Coccia. Sin la foto manca la victura Lorena Cadalbert.



Gianna Tomaschett ha er tratg la concorrenza da trais posiziuns.



Las gruppas victuras en la categoria dals pli juvenis: Landquart, Cunter e Tavau (da san.).



Han gudagnà l'occorrenza da trais posiziuns: Claudio Schwendener, Christina Ambühl e Leandro Petschen (da san.).



E quai èn las gruppas che han dominà la categoria U17–U21: Landquart, Tavau e Surselva (da san.).